

# Mealladh

le

CAILEAN T. MACCOINNICH.

*Oighreachd na h-dìge aig an aigne fo chis;  
foirfeachd na cruinne air ghleus,  
a' lasadh an sgàthan beò, 's inntinn gun sgìos  
a' co-fhreagairt gach leus; 's cha mheasar leath' prìs  
no cosgais aig tùs na réis.*

*Cridhe dian leum ri caochladh gach pong;  
clàrsach nan ioma-ghuth binn  
dùsgadh na dedìn; aigne co-fhreagairt fonn,  
mealladh 's gach teud; cobhar barra-gheal nan tonn  
mear chleasachd ri sìobadh gaoith.*

*Smuaintean gun stéidh a' sìor luasgadh dùil,  
grian maidne le gealladh làn  
'g altrum gun truas dòchas an tuilleadh lùiths;  
dealas 'toirt spionnaidh nuaidh 's caithream a chiùil  
'tàladh nam buadh le sàth.*

*Mi air sliabh chas na roghainn, 's gun roghainn ann,  
Blàthbheann le sgriodan beò  
ruith le mo cheum, 's gun an ceum ach fann;  
sprùileach le leathad tìm ceapadh mo chrann,  
a' fanaid ri oidhirp mo threòir.*

*Mi sìor dhìreadh le togradh, togradh gun deò,  
sùil dhìomhain air na h-àird;  
lùth-chleas na smuain a' faoin-shìreadh seòl  
'm farsuingeachd bhalbh talla na h-inntinn bheò,  
imcheist a' caochladh càil.*

*Ciùineas nan dùl a' cur fògradh air smuain,  
ealan na h-inntinn marbh;  
cruaidh-ghleac na toile air dhubh-mhisg fo bhuaidh  
dùsail neo-bheothant, 's bheir feasgar le gruaim  
ath-bhreislich le mosgladh garbh.*

*Cha sàsaich an dé le iùnnatas a thriall,  
cha leasaich e togradh dedìn;  
an diugh le ùr-fhaileas a' brosnachadh miann,  
impidh na spéis ri cur muinghin an cian  
's am màireach nach tig ri m' bheò.*